

Na osnovu člana II. 3. m) i člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 50. sjednici Predstavničkog doma, održanoj 18. jula 2013. godine, i na 31. sjednici Doma naroda, održanoj 23. jula 2013. godine, donijela je

Z A K O N
O IZMJENAMA I DOPUNAMA
ZAKONA O PUTNIM ISPRAVAMA BOSNE I HERCEGOVINE

Član 1.

U Zakonu o putnim ispravama Bosne i Hercegovine ("Službeni glasnik BiH", br. 4/97, 1/99, 9/99, 27/00, 32/00, 19/01, 47/04, 53/07, 15/08, 33/08 i 39/08), u članu 2. dodaje se stav 3. koji glasi :

"Lični podaci u putnoj ispravi podliježu zaštiti. Kopija putne isprave može se tražiti samo u postupku revizije državljanstva, prestanka državljanstva i u drugim slučajevima kada je to izričito zakonom propisano".

Član 2.

U članu 6. stav 1. tačka 1. dodaje se alineja d) koja glasi:

"d) oznaku za elektronsku putnu ispravu."

Član 3.

U članu 7. stav 1. tačka 2. dodaje se alineja d) koja glasi:

"d) oznaku za elektronsku putnu ispravu."

Član 4.

Iza člana 7. dodaju se novi čl. 7a. i 7b. koji glase:

"Član7a.

Putna isprava za izbjeglice ima:

1. korice koje su svijetloplave boje,
2. prednja strana korica sadrži sljedećim redom:
 - a) riječi: "BOSNA I HERCEGOVINA"
 - b) riječi: "PUTNA ISPRAVA",
 - c) riječi: "(Konvencija od 28. jula 1951.)",
 - d) oznaku za elektronsku putnu ispravu.

Tekst u alinejama a), b) i c) tačke 1. stava 1. ovog člana napisan je na bosanskom, hrvatskom i engleskom jeziku (latiničnim pismom) i na srpskom jeziku (ćiriličnim pismom).
Tekst na prvoj strani putne isprave je isti kao tekst na prednjoj korici.

Član 7b.

Putna isprava za lice bez državljanstva ima:

1. korice koje su sive boje,
2. prednja strana korica sadrži sljedećim redom:
 - a) riječi: "BOSNA I HERCEGOVINA",
 - b) riječi: "PUTNA ISPRAVA",
 - c) riječi: "(Konvencija od 28. septembra 1954.)",
 - d) oznaku za elektronsku putnu ispravu.

Tekst pod a), b) i c) tačke 1. stava 1. ovog člana napisan je na bosanskom, hrvatskom i engleskom jeziku (latiničnim pismom) i na srpskom jeziku (ćiriličnim pismom).
Tekst na prvoj strani putne isprave isti je kao tekst na prednjoj korici."

Član 5.

U članu 8a. stav 1. mijenja se i glasi:

"Pasoš, diplomatski i službeni pasoš, putna isprava za izbjeglice i putna isprava za lice bez državljanstva sadrže beskontaktni memorijski elemenat".

U stavu 2. riječi „čl. 6. i 7.“ zamjenjuju se riječima „čl. 6., 7., 7a. i 7b“.

Član 6.

U članu 12. stav 3. briše se.

Dosadašnji st. 4. i 5. postaju st. 3. i 4.

Član 7.

U članu 18. stav 1. mijenja se i glasi:

"Zahtjev za izdavanje putne isprave podnosi se lično, osim zahtjeva za izdavanje diplomatskog i službenog pasoša koji podnose nadležni organi Bosne i Hercegovine, odnosno entiteta, kao i putnog lista za državljane Bosne i Hercegovine koji nadležni organ može izdati i po službenoj dužnosti“.

Iza stava 5. dodaju se st. 6. i 7. koji glase:

"Licu kojem je zbog starosti, bolesti ili drugog hendikepa ograničeno ili onemogućeno kretanje može se omogućiti podnošenje zahtjeva na olakšani način, posredstvom mobilne radne stanice. Podnošenje zahtjeva za izdavanje putne isprave na olakšan način putem

mobilne radne stanice može se omogućiti i državljanima Bosne i Hercegovine u inozemstvu u slučajevima većeg broja podnosilaca zahtjeva za izdavanje putnih isprava na lokacijama udaljenim od diplomatskog ili konzularnog predstavništva Bosne i Hercegovine, kada ukupni troškovi putovanja i druge okolnosti ukazuju na racionalnost i opravdanost omogućavanja podnošenja zahtjeva na olakšan način. Agencija za identifikaciona dokumenta, evidenciju i razmjenu podataka (u daljnjem tekstu: Agencija) propisuje tehničke uslove i procedure za upotrebu mobilne radne stanice na udaljenim lokacijama.

Putna isprava može se preuzeti lično, posredstvom opunomoćenika i poštom, na način koji će biti propisan uputstvom koje donosi Ministarstvo civilnih poslova Bosne i Hercegovine“.

Član 8.

U članu 19. stav 1. iza riječi "prebivalište" dodaju se riječi: „ili boravište za raseljeno lice, dokaz o plaćenju cijeni putne isprave“.

Stav 3. briše se.

Dosadašnji st. 4., 5. ,6. i 7. postaju st. 3., 4., 5. i 6.

Član 9.

Iza člana 19b. dodaje se član 19c. koji glasi:

"Član 19c.

Uz zahtjev za izdavanje elektronske putne isprave podnosilac zahtjeva, odnosno lice za koje se po zahtjevu nadležnog organa izdaje putna isprava dužno je dati lične biometrijske podatke (slika, otisak dva prsta i potpis) radi autentifikacije za koju se koriste jedinstvene fiziološke karakteristike svakog čovjeka kako bi ga IT sistem autentificirao.

Od lica iz stava 1. ovog člana uzimaju se otisci lijevog i desnog kažiprsta, ako podnosilac zahtjeva nema kažiprst ili je vrh kažiprsta povrijeđen, uzima se otisak srednjeg ili nekog drugog prsta, a ako nema jedne ruke, uzima se otisak kažiprsta i srednjeg ili nekog drugog prsta druge ruke. Otisci prstiju ne uzimaju se ako to zbog medicinskih razloga, koji nisu privremeni, nije moguće.

Ako je lice nepismeno ili uzimanje potpisa nije moguće iz drugih objektivnih razloga, na obrascu putne isprave, na mjestu predviđenom za potpis upisuje se oznaka XX, a službeno lice na poleđini zahtjeva navodi razloge nemogućnosti uzimanja potpisa i to potvrđuje svojim potpisom.

Otisci prstiju i potpis ne uzimaju se od djeteta do navršene 12. godine života.

U skladu sa Zakonom o Agenciji, Agencija propisuje detaljnije načine uzimanja biometrijskih podataka".

Član 10.

U članu 25b. dodaje se tačka 3. koja glasi:

"3.Ko protivno članu 2. stav 3. ovog zakona traži kopiju putne isprave od državljanina Bosne i Hercegovine."

Član 11.

Član 26. mijenja se i glasi:

"Član 26.

Nadležni organi definirani članom 13. ovog zakona dužni su da dostavljaju podatke u centralni registar Agencije.

Državljanin može podnijeti zahtjev za izdavanje uvjerenja o činjenicama iz evidencija elektronskim putem preko portala nadležnih organa.

Agencija pruža tehničku podršku nadležnim organima za vršenje aktivnosti iz stava 2. ovog člana, o čemu donosi posebno uputstvo.

Član 12.

U članu 28. stav 2. briše se.

Dosadašnji st.3. i 4. postaju st. 2. i 3.

Dosadašnji stav 5. koji postaje stav 4. mijenja se i glasi:

"Na prijedlog Agencije, Vijeće ministara Bosne i Hercegovine utvrđuje cijenu putnih isprava".

Član 13.

Član 29. mijenja se i glasi:

"Član 29.

Pasoš za državljane Bosne i Hercegovine izdaje se s rokom važenja od deset godina. Državljaninu koji nije navršio tri godine starosti pasoš se izdaje s rokom važenja od tri godine, a državljaninu u dobi od tri do osamnaest godina starosti s rokom važenja od pet godina.

Diplomatski i službeni pasoši izdaju se s rokom važenja od pet godina.

Državljaninu koji ima status raseljenog lica i ima prijavljeno boravište pasoš se izdaje sa rokom važenja od dvije godine.

Državljaninu kojem se privremeno ne mogu uzeti otisci prstiju izdat će se pasoš s kraćim rokom važenja, o čemu posebno uputstvo donosi Agencija, a nadležni organ ovaj podatak upisuje na posebno mjesto u obrascu pasoša.

Putna isprava za izbjeglice i putna isprava za lice bez državljanstva izdaju se s rokom važenja od dvije godine.

Putni list za državljane BiH i putni list za strance izdaju se s rokom važenja od 30 dana.

Brodarska i pomorska knjižica izdaju se s rokom važenja od pet godina.

Član 14.

Ovlašćuju se Ustavnopravna komisija Predstavničkog doma i Ustavnopravna komisija Doma naroda Parlamentarne skupštine Bosne i Hercegovine da zajednički utvrde prečišćeni tekst Zakona o putnim ispravama Bosne i Hercegovine („Službeni glasnik BiH“, br. 4/97, 1/99, 9/99, 27/00, 32/00, 19/01, 47/04, 53/07, 15/08, 33/08 i 39/08).

Član 15.

Ovaj zakon stupa na snagu osmog dana od dana objavljivanja u "Službenom glasniku BiH".

Broj: 01,02-02-1-37/13

23. jula 2013. godine

Sarajevo

Predsjedavajući
Predstavničkog doma
Parlamentarne skupštine BiH

dr. Denis Bećirović

Predsjedavajući
Doma naroda
Parlamentarne skupštine BiH

mr. Ognjen Tadić